

## ■ CONVIVENZA

# La cuschina dals povers students

DA BETTINA CADOTSCH\*

**M**angiar insatge gustus fa simplamain bain a corp ed olma. Tge datti meglier ch'in bel plat cun differentas delicatessas? Quai pudess per exempel esser in bun toc charn da selvaschina cun bizochels e verdura u in gratinà cun brassà ed ina buna sosa. Per mai pudessi mintga di dar da quels menus! Deplorablain n'è quai dentant betg il cas. E sco quai ch'i va cun mai vai era cun blers auters students.

**I**ns po dir ch'i dat duas sorts students. I dat quels che van da mezdi adina en in restaurant u en in cantina a mangiar ed i dat quels che van tranteren al tancadi per in sandwich, cuschinar però per il solit sezs lur gentar. Quai en emprima lingia per spargnar daners. E cuschinar sez n'è atgnamain nagin problem, ins è gea vegl avunda. In problem datti dentant tuttina. Numnadamain ch'ins ha da cuschinar la saira avant il gentar per l'auter di.

**P**er l'ina n'han ins la saira betg propi gust da star ditg en cuschina, prender nauadora trais padellas e cuschinar. Perquai ch'ins è simplamain led ch'il di è passà e vul far la duscha per suenter pudair giudair la saira. E gea, era sch'ins ha sco student gia finì avant las 17.00, tranteren n'han ins era simplamain nagin temp da cuschinar perquai ch'ins ha anc ina massa da far, ha anc da finir projects u vul anc ir a far sport u s'entupar cun amis. Ins fa pia mo spert insatge e quai sa repeta adina puspè: pasta, ris, tartuffels... pasta, ris, tartuffels.

**P**er l'autra na gusta era betg tut tuttina bain



sch'i vegn stgaurà ina segunda giada il proxim di. In cordonbleu, ina liongia u er ina talgia, n'emporta betg tge, vegn sitg sco ina sola da chalzers. E gist tar la charn ston ins sa dumandar sch'i renda insumma da cuschinar ella cunquai ch'ella è bain in pau pli chara ed uschia donn per ils daners. Per mai ha quai la consequenza che jau na mangel durant l'emna prest nagina charn, e quai sco feglia d'in pur e chatschader. Quai è bain prest scandalus!

**P**linavant ston ins logicamain prender cun ins il da mangiar ch'ins cuschinar la saira avant en ina cuppa. E questas cuppas chaschunan gia las proximas ravgias. Perstgisai, ma po insatge ina giada inventar ina cuppa che na perda simplamain per 100 pertschient nagut?! I n'è propi betg bel sch'ins guarda en la tastga e tut ils cudeschs èn plain sosa da tomata.

**A**lura datti anc il problem che tut ils students vulan stgaurar lur da mangiar il medem mument. Sa chapescha enturn las 12.00. E sco sche la fonna fiss betg gia gronda avunda ston ins lura spetgar ditg, perquai ch'igl ha savens mo paucs apparats da micro-ondas. Nus avain per exempel sulettamain dus. Quai vul dir, la colonna è adina immens lunga.

Ed il meglier vegn pir: cura ch'ins dastga alura finalmain metter en l'apparat sia cuppa na stgaurà ins betg ditg avunda uschia ch'il gentar è la finala tuttina mo tievi.

**S**co quai che Vus vesais n'è la cuschina dals students betg propi il hit. Exact quai ha però per consequenza che nus vesain ch'in endretg gentar na sa chapescha betg da sez. Sche nus sesain finalmain cun nossas cuppas enturn maisa siemiain nus dad ina buna spezialitad da la mamma, dad in bun toc charn u da spaghetti al dente. La cuschina da la mamma è numnadamain schon la meglra ed ins realisescha pir quai cura ch'ins na l'ha betg pli. E perquai ans legrain nus tuts adina fitg sin la fin d'emna cura ch'i dat finalmain puspè in bun gentar. Tar mai datti speranza ch'ins da selvaschina cun bizochels e verdura.

\* Bettina Cadotsch è creschida si a Savognin. Ella studegia Multimedia Production a la Scola auta da tecnica e d'economia a Cuir e lavura tar Radio Südostschweiz.

## Vocabulari

cuschina – Küche  
 pover – arm  
 corp ed olma – Leib und Seele  
 charn da selvaschina – Wildfleisch  
 brassà – Braten  
 tancadi – Tankstelle  
 padella – Kochtopf, Pfanne  
 esser led – froh sein  
 giudair – geniessen  
 ris – Reis  
 tartuffel – Kartoffel  
 stgaurar – hier: aufwärmen  
 liongia – Wurst  
 talgia – hier: Schnitzel  
 sitg – hier: trocken  
 sola da chalzers – Schuhsohle  
 chatschader – Jäger  
 cuppa – hier: Schüssel  
 ravgia – Ärger, Zorn  
 tievi – lauwarm

Unterstützt von der  
 Lia Rumantscha



Lia Rumantscha